



Loth & Abram se departent d'ensemble, pour éviter la dissension de leurs bergers & pasteurs.



BRAM qui estoit riche en possession & cheuance, se partit d'Egypte avec sa femme, & tout ce qu'il possedoit. Il s'achemina vers Midy. entre Betel & Hai, où auparavant il auoit dressé son tabernacle, & en ce lieu il inuoqua le Seigneur. Et Loth aussi qui le suiuoit avec brebis & bœufs en telle quantité, que la terre ne les pouuoit contenir pour l'abondance des oüailles qu'ils auoient à paistre : Ce qui émeut noise entre les pasteurs de Loth & d'Abram. Et alors les Chananéens & Phéréséens habitoient en cette terre ; parquoy Abram dist à Loth, Je te prie qu'il n'y ait point de noise entre nous & nos pasteurs, car nous sommes freres, toute la terre est à ton commandement, ie te supplie departons-nous d'ensemble, & si tu vas à senestre, i'iray à dextre. Adonc Loth leua ses yeux, & vid toute la plaine du Iourdain, qui estoit (auant que Dieu eust destruit Sodome & Gomorre,) par tout abreuuée comme le Iardin du Seigneur ; & en ce lieu il dressa son tabernacle. Et Abram qui auoit promesse du Seigneur, de toute benediction en sa semence, vint en la plaine de Mambré qui est Hebron, & y edifia vn Autel.